

Na osnovu člana 22 Statuta Brčko distrikta BiH (Službeni glasnik Brčko distrikta BiH, broj 17/08), Skupština Brčko distrikta BiH, na 15. redovnoj sjednici održanoj 28. oktobra 2009. godine, usvaja

ZAKON BRČKO DISTRIKTA BOSNE I HERCEGOVINE O IZBORU I PROMJENI ENTITETSKOG DRŽAVLJANSTVA

Član 1

(Predmet zakona)

- (1) Ovim zakonom propisuje se postupak za ostvarivanje prava na izbor entitetskog državljanstva i prava na promjenu entitetskog državljanstva stečenog u skladu sa zakonom za državljane Bosne i Hercegovine (u daljnjem tekstu: BiH) sa prebivalištem u Brčko distriktu Bosne i Hercegovine (u daljnjem tekstu: stanovnici Distrikta).
- (2) U smislu ovog zakona, stanovnicima Distrikta smatraju se lica definisana kao stanovnici Distrikta u skladu sa Statutom Distrikta.
- (3) Ovaj zakon mora biti u skladu sa Zakonom o državljanstvu Bosne i Hercegovine i zakonima o državljanstvu entiteta.

Član 2

(Nadležni organ Distrikta za pitanja državljanstva)

Nadležni organ Brčko distrikta Bosne i Hercegovine (u daljnjem tekstu: Distrikt) za pitanja državljanstva je Odjeljenje za javni registar Vlade Distrikta (u daljnjem tekstu: Odjeljenje za javni registar).

Član 3

(Izbor entitetskog državljanstva)

- (1) Stanovnik Distrikta koji nema izjavljeno entitetsko državljanstvo može izabrati svoje entitetsko državljanstvo.
- (2) Stanovnik Distrikta iz stava 1 ovog člana koji želi da ostvari pravo na izbor entitetskog državljanstva, podnosi putem Odjeljenja za javni registar pismeni zahtjev nadležnom organu entiteta čije državljanstvo bira.
- (3) Zahtjev iz stava 2 ovog člana sadrži izjavu o izboru državljanstva entiteta čije se državljanstvo bira, a uz zahtjev se prilažu uvjerenje o državljanstvu BiH ili ovjerena kopija putne isprave BiH, ovjerena kopija lične karte i potvrda o prebivalištu u Distriktu.

Član 4

(Promjena entitetskog državljanstva)

- (1) Stanovnik Distrikta koji je državljanin jednog od entiteta ostaje državljanin tog entiteta, osim u slučaju da promijeni svoje entitetsko državljanstvo.
- (2) Stanovnik Distrikta iz stava 1 ovog člana koji želi da promijeni svoje entitetsko državljanstvo, podnosi putem Odjeljenja za javni registar pismeni zahtjev nadležnom organu entiteta čije državljanstvo želi da stekne.
- (3) Zahtjev iz stava 2 ovog člana sadrži izjavu o promjeni entitetskog državljanstva sticanjem državljanstva entiteta čije državljanstvo želi da stekne, a uz zahtjev se prilažu uvjerenje o državljanstvu BiH ili ovjerena kopija putne isprave BiH, ovjerena kopija lične karte i potvrda o prebivalištu u Distriktu.
- (4) Pravo stanovnika Distrikta da promijeni svoje entitetsko državljanstvo može se ostvariti samo jednom po osnovu prebivališta u Distriktu.

Član 5

(Obaveze Odjeljenja za javni registar)

- (1) Odjeljenje za javni registar dužno je da osigura da zahtjev za izbor ili promjenu entitetskog državljanstva bude potpun te da zahtjev i prateću dokumentaciju u najkraćem roku, a najduže u roku od sedam dana od dana podnošenja potpunog zahtjeva, proslijedi nadležnom organu entiteta kojem je zahtjev upućen.
- (2) U slučaju zahtjeva za promjenu entitetskog državljanstva, Odjeljenje za javni registar dužno je da o zahtjevu i pratećoj dokumentaciji obavijesti nadležni organ entiteta čije državljanstvo prestaje sticanjem državljanstva drugog entiteta.
- (3) Nakon što Odjeljenje za javni registar primi rješenje nadležnog organa entiteta, utvrdit će da li je podnosilac zahtjeva primio rješenje, prosljedit će rješenje podnosiocu zahtjeva ukoliko je to potrebno i potvrdit će da je državljanstvo upisano u matične knjige.
- (4) U slučaju da Odjeljenje za javni registar ne primi rješenje u roku od sedam dana od dana kada je rješenje trebalo da bude dostavljeno u skladu sa zakonima entiteta, šef Odjeljenja donosi rješenje kojim potvrđuje da je državljanstvo upisano u matične knjige bez posebnog rješenja.
- (5) U slučaju da Odjeljenje za javni registar utvrdi da državljanstvo nije upisano, o tome je dužno obavijestiti podnosioca zahtjeva.

Član 6 (Državljanstvo djece)

- (1) Dijete koje u skladu sa odgovarajućim zakonima BiH stekne državljanstvo BiH porijeklom ili usvajanjem, stiče entitetsko državljanstvo roditelja ili usvojitelja koji posjeduje državljanstvo BiH.

(2) Ako roditelji ili usvojitelji imaju različito entitetsko državljanstvo, dijete stiče entitetsko državljanstvo prema dogovoru roditelja ili usvojitelja, s tim da je potreban pristanak djeteta ukoliko je dijete starije od 14 godina života.

(3) Ako roditelji ili usvojitelji ne mogu da postignu dogovor, dijete stiče entitetsko državljanstvo roditelja ili usvojitelja koji je prvi upisao dijete ili je prvi podnio zahtjev za upis.

(4) Dijete iz stava 2 i stava 3 ovog člana može promijeniti svoje entitetsko državljanstvo kada napuni 18 godina života, osim u slučaju da je u međuvremenu izgubilo državljanstvo BiH u skladu s odgovarajućim zakonima BiH.

Član 7

(Državljanstvo naturalizovanih lica)

Lice sa prebivalištem u Distriktu koje stekne državljanstvo BiH naturalizacijom bira svoje entitetsko državljanstvo.

Član 8

(Nadležnost Odjeljenja za javni registar)

1) Odjeljenje za javni registar nadležno je za:

a) sprovođenje ovog zakona;

b) sprovođenje Zakona o državljanstvu Bosne i Hercegovine u okviru nadležnosti Distrikta;

c) vođenje evidencije o državljanima BiH koji su upisani u knjigu državljana BiH koja se vodi za Distrikt i podataka o njihovom entitetskom državljanstvu u skladu sa zakonima iz člana 1 stava 3 ovog zakona;

d) izdavanje uvjerenja o državljanstvu BiH uključujući i entitetsko državljanstvo u skladu sa zakonima iz člana 1 stava 3 ovog zakona;

e) donošenje podzakonskih propisa kojima se urđuje postupak za pitanja koja su u nadležnosti Distrikta, a tiču se državljanstva.

Član 9

(Stavljanje van snage)

Danom stupanja na snagu ovog zakona stavlja se van snage Zakon o izboru i promjeni entitetskog državljanstva lica s prebivalištem u Brčko distriktu Bosne i Hercegovine (Službeni glasnik Brčko distrikta Bosne i Hercegovine, brojevi: 3/04 i 40/04).

Član 10

(Prelazna odredba)

Do donošenja podzakonskih propisa u skladu sa ovim zakonom, primjenjuju se propisi doneseni u skladu sa Zakonom iz člana 9 ovog zakona, ukoliko nisu u suprotnosti sa ovim zakonom.

Član 11

(Stupanje na snagu)

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH pod uslovom da ne stupi na snagu prije nego što stupe na snagu Zakon o izmjenama i dopunama Zakona o državljanstvu Federacije Bosne i Hercegovine proglašen Odlukom Visokog predstavnika br. 12/09 i Zakon o izmjenama i dopunama Zakona o državljanstvu Republike Srpske proglašen Odlukom Visokog predstavnika br. 13/09.

Broj: 01-02-134/09

Brčko, 28. 10. 2009. godine

PREDSJEDNIK SKUPŠTINE BRČKO DISTRIKTA BiH

Mirsad Đapo, dipl. pravnik, s.r.